

Uc  
8083





Uc 8083 4<sup>b</sup>



stdr0015350

Biblioteka Jagiellońska

Uc 8083

1912 Mgt 301  
De vita, rebus gestis, ac obitu  
**STEPHANI PRI  
MI REGIS POLONIÆ,**  
ORATIONES DVÆ.

Prior,  
**CHRISTOPHORI VVARSE-**  
uicij, nobilis Polonj. [Warszawicki,  
Altera, [Krysztof]  
**CHRISTOPHORI STVRTZII,**  
nobilis Liunij, J. V. D.



**ROSTOCHII**  
Stephanus Myliander excudebat.  
Anno MD CXXVIII



MARTINO CROMERO

Episcopo Varmienſi,

CHRISTOPHORVS VARSEVICIUS

S. D.

**M**ITTO tibi laudationem meam, nescio qua laude dignam, scriptam quidem maiorum more, sine ulla (ut mihi videtur) suspitione, tam assentationis, quam aculeorum etiam minimorum. Quod & ipsum te in Sigismundi I. Regis funere video fecisse: & ingenuitatis referre gloriam, quam falsam aliquorum gratiam adulatione aucupari potius voluisse. Me quoque tot dominis, & regibus meis, ad funus usque (ut ita dicam) deducendis, manebit opinor nomen constantia: qui adeo non spem pramiorum apud viuos secutus, laudes etiam demortuorum oratione persequi voluerim: nescio an sciuerim. Benè vale, decus & ornamentum patriæ. Varsaviæ, 18. Calend.

Ianuarij. anno Domini

LXXXVII

vHs 164180

CHRISTOPHORI VARSEVICII

In obitum STEPHANI I.

Regis Poloniae,

ORATIO.

**V**ixit Stephanus Rex, atque utinam & vivere diutius potuisset. Magna enim hominum iactura est, sed regum bonorum maxima. Quo me vertam? Quæ hoc loco verba faciam? Tali quippe rege laudando, cui deesse posset oratio? sed præ dolore vox & omnia me deficiunt. Cui ego parere non cupio ac debeo, ne si priuato dolori cessero, ingratus sim erga regem eum, cui nulla alia referri gratia amplius potest, nec ulla non debet. Qua tamen in re sic moderabor orationi meæ, ut nec veram laudem ei detraxisse, neque falsam videar affixisse. Vos interim oro, ut aura benignitatis vestrae è portu in altum euehatis hoc lenè & demissum genus meum dicendi.

Natus est Stephanus Rex anno Christi supra mille quingentos, tertio & trigesimo, V. cal. Octob. sub Ioanne rege Hungariæ. Stephano Battoreo Palatino Transylvaniæ patre, Catharina Thelegdia matre, auis & parentibus clarissimis. ut potè cuius aui frater germanus, Matthia in Hungaria regnante, sexaginta Turcarum millia, quæ in Transilvaniam iruperant, in campo vulgo dicto Panis, vna die profligauit. Fratres habuit germanos duos, Andream & Christophorum, hunc palatinum Transylvaniæ à se factum, illum Isabella Regina Hungariæ supremum palatii præfectum: quibus cum circa patrimonij partitionem coniunctissimè vixit, & hoc turbine ac tempestate Hungariæ, in Somlio, tanquam in quodam sacrario, religionem Catholicam sartam tectamque conseruauit.

A 2

Opti-



Optimarum artium & humanitatis studia, domi primum attigit, & in ijs tantos profectus fecit, ut maximam virtutis & ingenij sui expectationem apud omnes excitaret. Demum à domestica disciplina ad aulam Ferdinandi Romanorū & Hungarorum Regis profectus est; quem honoris ergo patrem patriæ sepius appellabat. Qua in aula, ob ingenij elegantiam, quanti fuerit, vel illud in multis argumento est, quod Catharina Ferdinandi filie, quæ primum duci Mantuæ, postea Sigismundo Augusto nostro regi nupserat, Mantuam ad maritum deducendæ honoris gratia adiungeretur. Magnus enim est honos in Principum versari comitatu, sed idem ille magnis viris etiam decoratur. Itaque vidit ea occasione, orbis terræ decus, & reginam prouinciarum Italiam, in ipso flore iuuentutis. Nec expers erat omni ex parte tam Italici quam Germanici sermonis: morum autem & consuetudinum externarū ita gnarus, ut ijs de rebus eum loquentem qui audiret, nemo non vehementer miraretur. Etenim cum literis & lectione, tum verò vsu & tractatione rerum, prudentia comparatur. Erat ille haud dubiè in literis versatus, Latine ut scribere & loqui eleganter satis posset. Sed accedebat vsus rerum gerendarum multò præstantior, ut tot populorum moribus & vrbibus visendis, tot Principum aulis perlustrandis, tanquam ijs qui in sole ambulant accidit, omnia eius dicta & facta alijs audiendis & obseruandis, non potuerint non colorari. Neque enim hoc loco possum præterire, quod ex ipsius ore aliquando audiui. Venisse eum cum Ferdinando suo rege ad Augustana comitia, quæ Carolus V. Cæsar à Saxonico bello reuersus prima habuerat, & captum Ioannem Fridericum electorem secum adduxerat; & tum quidem Cæsarem suam ei dexteram in comitatu Ferdinandi porrexisset: demum & Reginam Mariam sororem Cæsaris, cum alijs proceribus Hun-

gariis, solenne epulum præbuisse: quæ natura & consuetudo reginæ illius fuerat, externos, maximè Hungaros, apud quos aliquando regnauerat, honorandi causa. Quæ ego idcirco commemoro, ut summis cum viris & Principibus versatum fuisse eum sciamus: & qualis quantusque semper habitus fuerit, agnoscamus. Pauci enim Reges sunt docti: pauciores apud externos versati: paucissimi vtiq; exornati. Iam verò ab his & eiusmodi (ut ita loquar) artibus & partibus Stephanus progressus, per omnes omnium honorum gradus, quò tandem peruenerit, videamus. Ludouico rege à Turcis ad Mohacium interfecto, duobus Regibus Ioanne & Ferdinando simul electis, civili bello exarsit Hungaria. In hoc bellum varia fortuna varijsque temporibus gestum, patriæ suæ procella delatus, talem se præstitit, ut quarumcunque tandem partium esset, hostibus terrori, suis verò admirationi esse, passim & ubique videretur. Quod tamen præter ætatem, & præter consuetudinem, nec opinanti euenisse nemo dubitauit. Est enim virtutis ubique magna inuidia, sed inter suos maxima. Quo etiam fiebat, ut, cum germani fratres tres Somlii coniunctissimè (ut dixi) viuerent, & vnā ac orthodoxam religionem vnanimes amplecterentur, Mariani milites ab æmulis dicerentur. Quas nihilominus ipsorum voces, magno animo Rex contempsit, & mox inuidiam virtute superauit. Fuit enim (ut alia eius industriæ & virtutis signa taceam) fuit in Hungaria primus: qui cum multa alia, tum etiam candentes globos, mirum, & alijs longè præsentius incendiorum genus contra hostes inuenisset. Quæ res tantum ei nomen & bellicæ industriæ attulit existimationem, ut à Ioanne Vayuda Transyluanie principe, breui post Varadino præficeretur & copias eius duceret, & summo denique in honore ab omnibus haberetur. Quo loco si quis fortè miretur,



conatibus & consilijs eius exitum non semper respondisse, is meminisse debet, magnorum virorum gestas res, iniquè euentis ponderari: ac vt valetudinem ijs chariorem esse, qui morbo graui & diuturno oppressi, à limine mortis reuersi sunt, quam ijs qui optimè semper & æquabiliter valuerunt: sic & homines non solum triumphis, sed & offensionibus belli secura recordatione secum repetendis, aliquando magis recreantur. Fuit quidem Stephanus noster terra iactatus, & alto (quod aiunt) variam & instabilem fortunam diu expertus est, multa aduersa tulit, multa pericula adiit, sæpè manus cum hoste conseruit: à Nartendio in pugna quadam captus & compedibus iniectis malè est habitus. Ad Hadadum contra Germanicas & Hungaricas Cæsaris copias infeliciter pugnavit, & vulnera penè lethalia aliquot accepit, qua ipsa die, aut Stephanum in acie casurum, aut eo superato malo, magnum aliquando principem futurum, quidam eius familiarium fortè prædixerat. Quid multa? vicit & victus est: fortunatus fuit: aduersos etiam casus aliquos habuit: cominus gladio, hasta eminus depugnauit: flauit & reflauit ei aura nonnunquam, quo ipso est eritque semper admirabilis: virtutem eius posteritas alet, fouebunt literæ, & nec edax ætas, nec vlla vnquam inobscurabit obliuio. Tanta enim est virtutis vis, tantaque species, vt vel hostes virtutis ipsi in admirationem virtutis rapiantur. Quid? tantumne, inquires, militaribus studijs Stephanus deditus fuit? Imò verò & legationibus functus est honorificis, & fidem industriamque suam patriæ probauit. Ac primùm quidem ad Ferdinandum & Maximilianum Cæsares, demùm ad solum Maximilianum legatus fuit: in qua ipsa legatione ob turbatas se absente conditiones pacis, iussu Cæsaris Viennæ captus, & ultra biennium sub custodia est detentus. Gasparum Bekefchium eius rei authorem tradunt fuisse: cui cum Stephanus virtus formidolosa esse cœpisset, vt à

Transyluania æmulum longius remoueret, aut etiam prorsus amoueret: qua auctoritate apud Transyluanum fuerat, Bathoreo legationem imponi curauit, & mox principis sui arma in Cæsarem vertit: vt, quod accidit, legato nihil eorum conscio periculum crearetur. Est enim proprium inuidiæ, eos circumuenire arte, quos non possit virtute superare. Illa tamen detentio, tantum abest, vt maculam aliquam Stephano inureret, vt etiam optandum ei fuerit detineri, dummodo, cum virtutis & fidei suæ testimonio, in pristinam libertatem poneretur. Totum quidem illud detentionis suæ tempus optimis transmisit studijs, & tùm antiquitatis monumentis, tùm in aula Cæsaris summis viris & externis legatis cognoscendis. Inter quos etiam erat vnus Franciscus Crasinius, qui Sigismundi Augusti Regis Poloniæ apud Cæsarem tùm orator: tandem verò Episcopus Cracouiensis factus, pro Stephano in libertatem asserendo magnopere laborauit. Mortuus est tandem Ioannes Transyluanus, Sigismundi Augusti Regis nostri sororis filius: cuius morte ad nouam noui Principis in Transyluania electionem, est peruentum. Erat tùm Spiræ in comitijs Bekefchius apud Cæsarem legatus, quem Transyluanus successorem sibi designare, & ille ad eius principatum iampridem aspirare, multorumque gratiam & fauores sibi aucupari non dubitauerat. Quapropter non temerè difficultatis aliquid ab æmulo habiturus visus est Bathoreus, cum subito eius virtus, non secus ac flamma quædam fulgere cœpit, & in adeundo principatu multis passibus Bekefchium superauit. est enim virtus & inuidia fumo & flammæ simillima & sicut ab inuidia ceu quodam fumo virtus initio obscuratur, sic dignitate auctus elucet tandem is, cui virtutis ergo meritò illa confertur. Electus est igitur Stephanus, non eblanditis, sed enucleatis suffragijs: non alicuius ope aut



aut patrocínio, sed virtute, & ingenio suo admirando. Atq;  
hic tamen non cessauit Bekeschius: sed vel eo etiam Battoreo magis minari, ac nouas & perniciosas res audacter in eum moliri vehementius coepit. Quibus ille de consilijs certior factus, praeuenire quam praeueniri potius ratus, arcem Bekeschij Fogarassum interceptit: eoq; ipso vix fuga elapso, omnem illum Transyluaniae motum compescuit. Nascentes enim domi seditiones, aut repente opprimendae, aut quouis alio consilio sunt potius auertendae. Bonis extus fugatusq; Bekeschius, contulit se ad Maximilianum Caesarem, quem diu multumq; sollicitatum eo tandem perduxit, vt ex praesidijs Hungaricis militum manus ei daretur: qua Transyluaniam repetere, & eius dominatu tandem aliquando posset potiri. Sed neq; tum conatibus eius fortuna aspirauit: victus est graui & aduerso praelio: ac primum quidem in Poloniam, mox in Hungariam Caesarianae ditionis se recepit, auxilijs omnibus vndequaq; desperatis. Iam tum Battoreus rerum suarum securus, & animo ac exultatione auctus, non solum de Transyluania retinenda, sed de acquirenda quoque Polonia cogitabat. Qua etiam de causa, pro comitijs electionis, legatos suos in Poloniam misit, regiam dignitatem ob ordinibus regni postulatum. Vidisses remmiram: cum, Caesare Maximiliano per Archiepiscopum Gnesnensem primum renunciato, frequens fremensq; nobilitas, Annam Jagelloniam, & eius maritum Stephanum Battorem, regem nominauit. Qui principio quidem, Caesaris legato Tiffenbachio a regno suscipiendo eum dehortante, paulo haesit, sed mox suorum animos celeritate aduentus confirmauit. Venit enim in Poloniam tum, & cum Anna Jagellonia matrimonium iniuit, diademata regni accepit, cum Maximilianus Caesar ordinibus imperij Ratisponae comitia indixisset, &

totus

totus in eo esset, ne imperij auxilijs nudatus, adeunda Polonia spe frustraretur. Quae vtriusque consilia adeo pluri mi mirabantur, ea vt diuinitus proficisci non dubitanter affirmarent. Sic enim ( vt dixi ) Maximiliano celebranti comitia mors obrepit, quae occulta quadam fatorum via hoc regnum tranquillauit. Sub idem ferè tempus sua etiam Polonica habuit Rex comitia Torunij: & morte Caesaris Maximilani audita, ex incerto certum sibi regnum fecisse iam videbatur: cum subito Gedanensis erupit tumultus, nouitate rei atrox, motu grauis, inclinatione temporum formidandus. Hunc tamen Stephanus Rex ita pacauit, vt primum quidem praelio Dersauiensi Gedanenses fregerit, demum & aliquot mensium obsidione presserit: ac tandem interponentibus pro ijs se aliquot praecipuis Germaniae ducibus, ad officium reuocauerit. Quo eodem ferè aut paulo superiori tempore, Bidgostiam, literis publicae fidei non impetratis, ad regem Bekeschius supplex venit, & non modo culpe veniam, sed egestati etiam suae luculentum inuenit perfugium. Tanta enim clementia Rex erga eum fuerat, et tantum ei confidebat, vt aliquoties somno graui oppressus, solum Bekeschium in penetralibus adium circa se versari proximè pateretur. Quae tamen spes & de Bekeschio concepta opinio minimè Regem fefellit, magnam verò mansuetudinis laudem eidem attulit ad memoriam posteritatis sempiternam. sed ad propositum reuertamur. Bellum Gedanense secuta sunt Varsauiensia comitia, in quibus maxima post hominum memoriam pecunia impetrata, bellum est decretum contra Ioannem Basilij filium, magnum Moschorum ducem: cuius cum diu multumq; alias, tum verò hoc Stephano regnante in Liuania nobilitata est crudelitas. Quem ille ita domuit, vt quemadmodum sua audacia, vicinorum ignauia, paulo ante creuisse, sic Stephani regis virtute,

B



tute, nostrorum verò fortitudine, animo & viribus con-  
disse videatur. Erant præterea superiori interregni tem-  
pore, sine certo ordine ac ratione, à nobilitate vsurpata  
quædam iudicia, quibus publicæ quieti & tranquillita-  
ti cauebatur. Itaq; in iisdem illis Varſauienſibus comi-  
tijs, ea iudicia denuò Rex firmavit, & prudentia ſua cer-  
tiſq; legibus definiuit. Quo haud ſcio, ſi quid aut nobi-  
litate beneficio gratius, aut nominis ſui fama ad poſterita-  
tem transmittenda, facere potuiſſet illuſtrius. Nihil iuſtitia  
eſt populare magis, quæ paulò ante ſperatu quàm obtentu  
facilior videbatur. Peractis Varſouię comitijs, & Geo-  
rgio Friderico Marchione Brandenburgenſi in Pruſſia duce,  
more & inſtituto maiorum, in fidem & clientelam regni  
publicè & ſolenni cum cæremonia accepto, in Ruſſiam ſeſe  
contulit: in cuius metropoli, Podkouam hominem Vala-  
chum & obſcurum, ſpecie quadam militiæ, libertate & do-  
milio regni abutentem, pacemq; publicam perturbantem  
capite truncari imperavit. Leopoli, cum maximarum rerũ  
cura & cogitatione diſtentus, integram penè æſtatem tran-  
ſegieſſet, Cracouiam eſt proſectus: vbi magni Moſchouię  
ducis tumidos & ſibi præſidentes audiuit legatos, cum mo-  
derationis animi ſui gloria, & admiratione omnium ſingul-  
lari. Qui quidem animi tumor, tanto magis in Moſcho,  
& eius legatis eſt notabilis, quantò recentior erat victoria,  
de numeroſo eius exercitu parta: qui Vendam oppugnans,  
à regijs copijs, cum Sueticis coniunctis, grauiffimè fuit pro-  
fligatus. Dimiſſis Moſchi legatis, & externorum militũ  
conſcribendorum ergò, certis turmarum præſectis in vici-  
nas regiones ablegatis, tandem in Lituaniã proſecturus,  
venit Rex Varſauiam, atq; ibi menſis vnius ſpatio moratus  
mox regina coniuge valere iuſſa, in eam ipſam diſceſſit  
Lituaniam, quam, ex quo in Poloniam venerat, nondum  
atti-

attigerat: toto illo tempore agitans animo bellum, quod  
pro ſalute & dignitate Reipub. contra immanem & hæ-  
reditarium harum prouinciãrum hoſtem adminiſtratum  
cupiebat. Deum immortalem, quanta tum in aduentu e-  
ius in Lituaniã lætitia, quanta gratulatio, quantus fuit  
concurſus, quantum non dicam ordinum ſed hominũ  
inter ſe certamen, in eo ac tali Rege ad bellum omni ra-  
tione iuuando atq; promouendo. Præſtat enim ducis vir-  
tus & ſcientia vnius, magnis inconditis exercitijs. Hanc  
igitur Lituaniã Rex aduentu ſuo non tam recreauit quàm  
auxit, non tam paſſibus quàm victorijs perlufirauit. Pri-  
mũ autem Polociã à Moſcho Lituanis aliquando ad-  
emptã, aggreſſus eſt: ac vna & eadem expeditione Soco-  
lam, Suſſã, Cozianã, Nieſcerdam, Craſnam, Vſuiatã,  
hoſtiles arces & munitiones in poteſtatem ſuã redegit,  
Magna hæc & penè admirabilis vnius expeditionis erat  
victoria, autumno Cracouię ſuſcepta, hyeme in Lituaniã  
apparata, extrema & tempeſtuofa æſtate in agro Poloci-  
enſi conſecta & terminata. Nam & in expugnatione Soco-  
læ hoſtilium copiarum duces, Seremetus & alij ſunt capti  
& aliquot Moſchorum millia caſa ad internecionem, no-  
biles quidã Palatini capti, Polocia ingens tormentarij  
pulueris & comæatus omnis generis vis ablata: totus de-  
niq; ille Polocenſis tractus, à quo non iam Lituaniã, ſed  
Vilnã ipſi imminēbat periculum, eſt recuperatus. Itaq;  
reuerſus tandem eſt Vilnã cum triumpho Rex, & mox  
Grodnam, ac inde, ad conuentum habendum Varſauiam  
in viã ſe dedit: cum Grodnã Gaſparum Bekęſchium,  
grauĩ antea morbo, & demum vigilijs apud Polociã  
conſectum, non ſine dolore amiſſiſſet. Iam verò Var-  
ſauienſibus comitijs ad gerendum & continuam-  
dum bellum pecunijs imperatis, multorumq; exterorum  
B2 Prin-



Principum legatis auditis, in Lituaniā Rex rursus se recepit. Variè tum Moschus cum eo agere, & extrahendū temporis ergò, non tam oratores, quàm exploratores suos solebat ad eum ablegare. Quibus tamen artibus, & Moschi pollicitationibus circumueniri se non passus, adulto iam in Lituaniā vere, & virentibus campis, exercitum duxit ipse in expeditionem: ubi cum per inuia & immensa terrarum spacia iter fieret, pro se quisq; sentiebat aliquid incommodi: ipse saltem Rex omnes omnium rerum temporumq; iniurias patientissimè perferebat. Calsnikos quiden vti peruenit, habita deliberatio est, vtrum Vielicolucos, an Smolenscum placeret proficisci: quæ hostiles vires seu munitiones pari interuallo distare videbantur. Tandem verò vincente omnium sententia, Vielicolucos est itum, qui paucorum dierum oppugnatione, Moschicis legatis inspectantibus, capti & in potestatem regiam sunt redacti: hominum millibus aliquot, qui obstinatius se defenderant, interfectis, magis furore Martis, quàm ira victoris. Quanquam violata à Moschis fide, narrata contra se eorum opera, quos captis munitionibus incolumes dimittebat, non poterat non vehementius commoueri. Ingrati enim id efficiunt; vt gratis etiam fons perennis benignitatis exarescat. Captis demum Vielicolucis, Neuelia, Zauolocia, & vniuersus Vielicolucensis ager in regiam peruenit potestatem. Lituania post multos annos Vielisio est aucta. De superbo deniq; hoste, ea est parva victoria, quæ omnium regum & populorum ora in nos conuertit, & huius regni gloriam penè intermortuam excitauit. Erat paulò ante mortuus Regi frater Christophorus Transyluaniæ princeps: post cuius mortem, Sigismundo eius filio impuberi, Amurates Turcarum Imperator, tributum dimidio maius imponere conabatur, sed regis nostri eius patruū auctoritas, tanta apud Turcam fuerat,

vt

vt æquiores se tandem ei præstaret, & nihil infesti in Transyluania moliretur. Quin etiam breui post idem, Ianiculam Valachiae regulum, ob iniurias, quas vicina nobilitati intulerat, in Regis gratiam principatu spoliavit. Quo demum in Poloniam profugo, ac Leopoli capite truncato, Rex omnem Valachi prædam apud se retinuit, & aliquot Turcæ minaces legationes ad se missas, eam prædam repetentes dignitati suæ possiduit. Imò verò & Teinia à Kozakis deleta, & aliquot castellis, in confinio contra Tartaros opportunè erectis, testatus est, quantum expediat Reipub. præstantem animo Regem, & bellandi gloria clarum, huic imperio præfigere. Etenim fortitudine regia, rerumq; à nobis gestarum fama, aliæ quoq; gentes & nationes, vt vel suspiciant, vel contemnunt nos, facile commouentur. Iam ergo Vielicolucis & alijs locis præfidijs firmatis, noua quadam contagione morbi omnes tum peruadente, per immensam Neueliensem sylvam, superatq; difficillimam, in Lituaniā Rex contendit: & quoniam Varsovia indixerat comitia, ad ea celebranda sine mora properauit. Erat tum non nemo, qui à bello cessandum, & hostem pacis conditiones ultro petentem, castigatum, missum faciendum, dictitabat. Verum ille magno & excelso animo, hæc consilia reiiciens, aut Liouonam regno restituere, aut cum perfido & insidioso hoste, vel quouis tandem exitu, bellum voluit terminare. Est enim infida cum hoste pax, non pax, sed pactio maioris bellicæ tempestatis. Aggressus est ergo contra Moschum, & persecutus bellum tertium, ordinum summa consensione decretum, voluntate erga Rempub. iustum, principio paululum dubium, exitu tandem & victoria gloriosum. Progressus est magno ad Plescouiam cum exercitu: Ostrouiam, quæ illi oppugnanda prima se obtulerat, cepit: nec mora, & Plescouiam ipsam irruptione

B 3

per-



pertentauit. Dices, non omnium optimè id ei celsisse: & oppugnationem illam non suo modo, ordine, loco, tempore institutam & perfectam extitisse. Dices sanè quod velis, nec verò illud etiam negaueris, in re & arte bellica, multos multa opinari: cum vero ad rem est ventum, nec quod sciunt posse, nec quod possunt velle perficere. Magnorum artificum opera exposita esse inuidiæ, non deesse vbiq; Phormiones: & facilius notare aliquem vitia etiam minima, quam summorum hominum virtutem virtute exæquare. Nos quidem belli ipsius fructum & exitum videamus, qui talis est, vt Liuania prouincia; pro qua occupanda tam diu multumq; Moschus laborauit, tantos sumptus fecit, tantum sanguinis suorum hostiumq; fudit; eo nobis accederet: ille verò totus animo & viribus frangeretur. Memini ego hunc ipsum Regem in castris ad Pleiscouiam (quem utinam in cælo beatum sic possim aspicere) memini, inquam, dicentem mihi, cum in Sueciam legatum missurus, prius in locum tractandæ paci cum Moscho destinatum me ablegaret, decreuisse se, potius extrema pati, quam vt in fraudem Reipub. vel tantillum in Liuania terræ, in qua Moschus vestigium faceret, ei relinqueretur. Perfectum igitur est, summa Dei Opt. Max. benignitate, cura & auctoritate sacrosanctæ sedis, auspicijs regis, fortitudine ducis, legatorum industria, inuicti exercitus tolerantia & perseverantia, vt vniuersa, quæ Moscho parebat, Liuania nostræ fieret potestatis. Qua parta, geminatam legationem ad Regem Sueciæ affinem suum, mittere placuit, qua quod adhuc reliqui in Liuania erat, certis conditionibus sibi ab affine concedi Rex postulabat: & demum his ita gestis, ad constituendam Rempub. totum se conuertit. Erat ab eo superioribus conuentibus postulatum, vt de modo & ordine electionis certi aliquid constitueret. Omnium quippe comitiorum

magnus

magnus est astus, sed electionis maximus. Itaq; à bello victor reuersus, indixit Varisauia totius regni conuentum, & in ordinum deliberationem posuit id, quod certa forma & ratione electionis perscribenda, ad salutem & dignitatem Reipub. inprimis spectare iudicauit. Sed latere hic aliquid nonnulli suspicabantur, infectisq; rebus, tam ex illis quam ex proximè præteritis comitijs discessum est, exemplo, vt mea quidem fert opinio, non satis ad posteritatem commendato. Sunt enim parui animi, & inopis consilij, friuolæ suspiciones, argumentum: magno autem animo, multiplici consilio Respublica gubernatur. Spe sua frustratus Rex, clauum nihilominus non abiicit, ad quem diuino nutu & potestate erat positus, sed eò etiam magis, quò pacto fidem & operam suam, laboranti Reipub. probare posset. Nulli vnquam rei & tempori indormiuit. Mahmetes primum, deinde Aschlan Cherei Tartarorum Cham eius regno imminebant: hos perterruit, & ad mittendam legationem adiecit: Podoliam, eorum armis obnoxiam, pacatiorem cultioremq; reddidit. Magnus Moschorum dux est mortuus. Mox Haraburdam in Moschouiam misit, & gentis illius consilia, penitioraq; omnia scire & peruestigare contendit, ad mittendam deniq; ad se legationem Moschouiam excitauit. nouas & perniciosas res moliri Riga coepit: hanc primum literis, post & militibus suis sic exterruit, vt per Curlandiæ ducem supplex veniam petere, & Grodnam ad Regem legationem mittere, non dubitaret. Multæ in Lituania & Liuania arces muniendæ erant: quoad melius potuit muniuit, & præsidio comiteatq; confirmauit. Salinæ non ita multum pecuniarum cum in regnum venisset, inærarium importabant: has ferè dimidio auxit. Gedanenses, Rigenes qui ad pendendum portorium adduci poterant nunquam, hos adduxit. Vectigalia



Ha regni accisa fuerant: hæc Marienburgensi, Grodnenſi, Dorpatenſi, Samborienſiſq; æconomia, tot prædijs & præſecturis ei adiunctis locupletauit. Venationes, quibus Lithuanía claret, imminutæ videbantur, has circa Grodnam ita excoluit, vt toto orbe terrarum, plurimarum & diuerſiſſimarum ferarum venatus nusquam ſit maior & copioſior. Poſtremo, dimiſſis Grodna Moſchouia oratoribus, qui ad eum ſplendido & frequenti aduenerant comitatu, in eam curam totus incubuit, vt ſuo tempore & loco haberentur comitia: in quibus, quàm multa, honeſta, vtilia, neceſſaria decerni volebat, legationes eius, per omnia omnium regni prouinciæ municipia ſparſæ & dimiſſæ teſtantur. Iam verò quid ego de virtutibus eius multis & maximis loquar? Quid pietatem in Deum, charitatem in patriam, beneficentiam in omnes proferam? Quid iuſtitiam, quid fortitudinem, quid manſuetudinem, quid temperantiam eius commemorem? Maiora hæc ſunt, quàm vt non dicam mea, quæ minùs quàm mediocris eſt, ſed eloquentiſſimi etiã cuiuſq; viri par eſſe poſſit iſs oratio. Infer oculos in omnes regni huius partes: Cracouia, Vilna, Lublini, Polocia, Claudiopoli, Societatis Ieſu templa & gymnafia, ab eo partim fundata, partim locupletata intuerè: quibus omnibus clariſſima extant veſtigia erga Deum Opt. Max. illius ardentiffimæ pietatis: Amor verò erga hanc Remp. quantus fuerit, commodiſq; & ornamentis ipſius omnibus quomodo proſpexerit, ac ſi deniq; vita ſupetiſſet, proſpicere adhuc magis quomodo voluerit, docent hæc magnifica templa & ædificia publica ab eo erecta: Domus vere regia Grodna exſtructa: eccleſia ædificari cœpta: Loſſouia nouis ædificijs aucta: Xenochoodium Varſauia conditum, & emptis poſſeſſionibus ditatum: Arx deniq; Varadinenſis totius Tranſyluania propugnaculum, magna eius cura & ſumptu munita facit

teſta-

teſtatum. De liberalitate & beneficentia eius non loquar, cum difficile ſit eos, quos beneficijs affecit, percenſere omnes, poſtponere alijs alios indecorum iudicatur. Tantum illud & quidem verè & liberè dicam: nullum vnquam poſt conditum hoc imperium, Regem fuiſſe, qui paratis ſeu numeratis pecunijs dandis, maiori liberalitate & beneficijs erga nos vteretur. Iuſtitia fuit tanta, vt vita prius q̃ recta ſententia decederet: nec vllius meritorum aut conditionis rationem in iudicio haberet: nec deniq; publicorum munerum, aut dignitatum mercatum vllum inſtitueret. Eſt enim omnis mercatura vilis, ſed dignitatum viliffima: à quo ille ita abhorruit, ita ius dixit, ita iuſtitiam coluit, vt Salomon alter in iudicio præſidere videretur. Teſtes ſunt iſtæ lachrymæ & ſuſpiria populi: teſtis ſqualor & mœror regni vniuerſi: teſtes bonorum omnium voces, qui non dominum ſed parentem, non Regem ſed libertatis ſuæ vindicem & patronum, amiſſe ſe, proſitentur. Age, quanta manſuetudine, & fortitudine pariter fuerit, videamus: quas ille virtutes, quodammodo inter ſe diſiunctas, diuturno rerum vſu & prudentia coniugauit. Fuit enim, ſi quis vnquam fortiſſimus, ſiue in adeundo hoc regno eius animum conſideres, ſiue tot pericula adita, tot vitæ incommoda, tot maledicta, magno animo ab eo lata, intueare, & tamen viciffim tam clemens & manſuetus fuerat, vt non magis virtutem eius hoſtes pugnantes timuerint, quàm placabilitatem victi fuerint admirati. Quo etiã eſt factum vt ſi vixiſſet diutiùs, Moſchouitico imperio auctum eum fore plurimi augurentur. Quàm verè nescio: illud quidem non dubitanter affirmabo, magnam virtutis & benignitatis ipſius vel apud hoſtes famam fuiſſe: eo verò ſalutariùs accidere nihil Reipub. potuiſſet: Coniunctæ enim vires crescunt: diſtractæ pereunt. Reſtat, vt de temperantia, frugalitate,

C



litate, & sobrietate ipsius, pauca adhuc verba faciam. Quam hoc frugalitatis nomine, præpotentes & magnanimos Reges, laudari scio non solere. Fuit ergo in victu vestitu, veneris, omnibusque alijs voluptatibus, quibus potentiores diffluere solent, continens & moderatus. Fuit omnibus comis, aditu & allocutione facilis, intelligentia sagax, lingua ad respondendum promptus: fuit & obrectatoribus adulatoribusque infestus, eum qui aliquem apud eum accusasset, cum expediebat, celare non est solitus: idem fidei, quæ silentio debebatur, custos eximius, ita denique virtutibus omnibus cumulatus, ut non iam præceptionibus, sed instituto vitæ, non hortatu, sed exemplo suo, multos à luxu parsimonia, ab impuritate morum continentia, ab omni vitiorum genere & turpitudine, decore & honestate auocare niteretur. Quo quantum quidem effecerit, iudicent alij, mihi satis fuerit digitum ad fontem (quod aiunt) intendisse: & qualem & quantum, in hac Repub. Stephanus se præstiterit Regem, ostendisse. Est sane factu incredibile, ea quæ tot seculis delapsa fluxerunt, paucorum annorum spatio, vincere vnum potuisse. Licet tot tantosque capite plexos, tot infamia ab eo notatos, liceat numerare. Multis voluisse sat est, lampas (quod aiunt) quæ tradetur, mortuorum studia & instituta facilius illustrabit. Sed age progrediamur, & quàm multæ & nobiles eius etiam sententiæ, quàm multa breuiter & acutè dicta, quam multa plena reconditæ sapientiæ atque doctrinæ, videamus. Solebat ille crebris usurpare id sermonibus: Qualis quisque Princeps in vita fuisset, supremam eius diem non obscure demonstrare. Multos sibi sepulchra condere, & centum milibus passuum ab eis mori atque tumulari. Homines si vel indies ab alijs fraudarentur, cum hominibus & non cum brutis animantibus, vivere oportere. Pugnæ locum in  
campo

campo aliter eligi, aliter in ædium penetralibus cogitatione designari. Multos de principum consilijs iudicium ferre, sed non peracque esse conscios causarum. Polonos, si Hungaris sapientiores in regibus eligendis non fuerint, nec futuros esse feliciores. multa & magna alia dicta & sapienter eius consulta lubens prætereo, ne longa eorum enumeratione sim molestus. Iam quanta dignitate oris & actionis, quanta habitudine corporis, quanta & quàm admirabili militari facundia præditus fuerit, quæ denique & quanta animi & corporis ornamenta omnia habuerit, longum esset percerere. Quare, si olim Gaditanus quidam Titus Liuij fama commotus, ab ultimis terris visum eum Romam venit, simulque ac vidisset discessit, quot & quantos putamus venturos, ad hunc regem fuisse, si quis & quantus fuerat penitus eum cognouissent? Omnia namque in eo concurrebant simul, virtus, sapientia, potentia, & usus & tractatio rerum, cognitio linguarum, literæ, cura, cogitatio, & omnes denique artes tam belli quàm pacis. Quid igitur dicat aliquis? nihilne erit quod in eo quoque reprehendas, nihil nobis relinquas in vitæ moribusque eius notandum: quò à rebus se indignis regum etiam alij fortasse absterreantur? est enim magistra morum & frænum improbitatis historia: cuius cum istæ laudationes, quæ in clarorum virorum morte aut funere sunt, magnam partem occupare soleant, quid obstat, quo minus, his quæ laudanda erant enarratis, vitia etiam modestè breuiterque notentur, ne solis laudationibus mendosa sit oratio? Quo nomine rerum Romanarum scriptor nescio quis Romanos suos reprehendit. Itaque sic dico, sic pronuncio, sic me intelligi volo, quod aliqua etiam quæ in Stephano reprehendi poterant, tandem vobis relinquo, & regem hominem esse fateor, ea lege & caligine seculi natum & versatum, ut hanc sarcinam corporis  
C 2 depo-



deposuisse, quàm hominem totum exuere potuisse prius non videatur: sed illud vicissim contendo, per omnem vitam dedisse illum operam, ut quàm minimis paucissimisq; vitijs laboraret. Etenim cum sine vitijs vivere non possimus, expedit ut eo minora (paucioraq; habeamus. Fuerit sanè quàm Regem fortasse decuisset, in iram pronior: an cum recollegisset se, mox non fuit sedatus & moderatus? Dissimulare quod prudentiæ est, nunquam voluit: at & simulare, quod malignitatis habetur, ne cupiuit quidem. Domesticiis multis multa credidit, & consilia sua aliqua, quàm par erat, citius in vulgus manasse intellexit. Fuit persuasus facilius, fuit & obstinacior aliquando. Fuit valetudinis negligens, & vitæ prodigus suæ, quod pericula tot ab eo adita, tot superata testantur mala. Fuit plus, quàm regium videbatur, diligens ac experiens paterfamilias. Interim etiam æs alienum nobis dissoluendum non reliquit, & ea quæ accepit, non tantum sarta tecta q; eum amplificasse quis ignorat? Multa & magna tributa à nobis exegit: multa & magna vicissim ijs perfecit, vrbes & ædificia ampla vitabat, minora oppida & rura frequentabat. Promissorum erat tenax, sed & in promissis cunctator est notatus. Magnarum rerum fuit admonitus, sed & in magnis lapsus est vel nonnunquam. Ingratus erga aliquos est dictus: non est quod laudem, si verè; pectoris mei angustia non capit, si temerè. Illud quidem dico, ut ingrati animi magnum est vitium, sic non commemorari sed exprobari videtur beneficium, quod quò maius difficiliusq; relatu sit, eò pro gratia odium sæpius retulerit. Religiosus videri potius quàm esse putabatur, vel ab hoc extremo eius actus vitæ, sumpto argumento suspicari, intellectus imbecillitatis & hominum est vitium, certò scire & cognoscere, opera sunt diuinitatis. Illud ego quæro, num satis non fuerit,

cum tua omnia omnibus probare non possis, bonis saltem si probaueris? & quisquam dubitabit, hæc leuiora vitia pensasse eum virtutibus etiam singularibus, omnes antea-ctæ vitæ sordes, pietate et castimonia eluisse, dedisse non adumbrata, sed expressa signa suæ religionis atq; virtutis: rerum postremo gestarum splendor, & magnitudine (ut ita loquar) suos in corpore nauos obscurasse? ita ut & Regem fuisse, & multa regia eum in se habuisse, nemo negauerit, & cum virtutibus proprijs, tum vitijs etiam alienis magnum & admirabilem Principem tota Europa extitisse. Nisi forte, ut dictum est, in hoc extremo quasi actu vitæ, in eo aliquis aliquid desideret, dissimilem quodammodo sui dicat fuisse, & tantum itineris ardui, tantum longinquæ profectio- nis sine sacro comite, sine cœlesti viatico, conficere eum voluisse. Cui ego respondeo, ne id quidem prætermittere, si pauculas horas superuixisset, eum cogitasse. Iamq; cum membra gelida essent omnia, cum difficilis anhelitus occupasset præcordia, sic christianè philosophari eum non destitisse, & interruptis ac morientibus vocibus, ad senatorem quendam hæc protulisse: Liceat, inquit, mihi affari te illis Tertulliani verbis: Annos tres & quinquaginta exegi: qui quales sint, scio, quales futuri sint, ignoro. Enimuerò dubium esse potest, quàm hoc piè & religiosè dixerit: quã porrò præceptis & lubricus iste sit agonis locus: quàm deniq; omnia in homine plena spei & confidentiæ videantur. Floret, hîc marcescit illic: totum se confert huc, mox transit illuc: sperat & expirat fortis quamlibet Imperator. Noster quidem Stephanus ita vitam egit, ut in contemnenda morte sapiens videri vellet: Mortem certè ipsam obliuioni non traderet, spiritum suum pro Repub. vilem duceret, sed salutis æternæ iacturam ne faceret, sedulò procuraret? venerationibus multum temporis daret, sed & cultum diuinum quo ad



quoâd eius fieri maxime poterat, nunquam negligeret, ac de breui & incerto exitu vitæ, dies noctesq; cogitaret. In hoc inquam cùm totus esset, à venationibus Grodnam reuersus, ex magnis illarum regionum frigoribus, repentinos horrores sentire cœpit, & domi aliquandiu præter morem conqueuit. Mox verò aduentante Dominico die, continere se non pōtuit, quo minus in templo, sacro & concioni publicæ interesset. Vnde demum prægrauante morbo, corpore vasto & repleto, membris omnibus iam ante debilitatis, ægritudine animi & corporis aucta, extinctus est Idibus Decembris. Nos in hoc squallore & gemitu, in his miserijs, in hac interregni reliquit tempestate: vt cuius antea virtute intercludi hostium audacia, cuius occupatione otium, labore quies, industria commoda & ornamenta nostra contineri, hæc eadem omnia eius interitu, collapsa & prostrata videantur. Quæ cum ita sint, si Boleslao Chabri Rege olim mortuo, vniuersa Polonia, totum annum in tanto luctu & squallore fuit, vt nec conuiuia vlla, neq; choreæ celebrarentur, neq; cultioribus vestibus nobilium virorum, aut scēminarum quisquam vteretur, nos tandem in huius & tanti Regis morte quid faciemus? Quas voces edemus? Quo dolore & gemitu mortuum prosequemur? Amisimus sapientem Regem, iustum iudicem, fortem & strenuum bellatorem. Perdidimus decus & splendorem patriæ, præsidium stabilitatis, ornamentum dignitatis nostræ. Hic demum Rex, non modò nobis præfuit, verum etiam profuit: non solùm nos rexit, sed & texit; non solùm seruauit, verùm etiam beauit: non modò nobis detraxit calamitatē, sed & auxit cum imperio dignitatem. Quo abiisti pater? Quo raptus es gubernator? Quis te nobis abstulit præsidem & vindicem libertatis? Siccine cæteris animantibus vita erit longissima, hominibus breuissima? Viuent annos

annos alij Nestoreos, tu in medio felicitatis cursu, in media rerum gerendarum via nos deferes? Gaudium luctus, maior gratulationes, gemitus laudationes nostras intercludet: heu quàm fallaces spes, inanes hominum sunt cogitationes. Tu hostium nostrorum terror, amplificandorum commodorum & ornamentorum auctor, tu noui imperij conditor esse debuisti. Tu verò in squallore & gemitu, tu orbatos ope, consilio & auctoritate destitutos tua, nos reliquisti: tu in beatissimarum mentium conciliū, tu in illum plenum syderum & illustrem locum, longè à nobis discessisti. Nos iactamur his interregni fluctibus: nos tot & tantis scopulis expositi sumus: nos tanquam sine nauclero nauis in alto fluitamus. Tibi præter hoc mortale corpus decessit nihil: expers es malorum omnium: pro hac caduca & fragili vita (si vita & non mors potius est dicenda) cumularis beatudine sempiterna. Nos quidem, quam iam tibi gratiam aliam referamus, non habemus, quam beneficijs tuis erga nos memori mente colendis, & meritis virtutibusq; tuis prædicandis. Si omnibus, quibus cum vixeras, placuisti, debuisti: si id non præstitisti, neq; omninò potuisti. Tua in Hungaria adoleuit pueritia: in Germania & Italia exercuit se adolescentia: virtus illustrata est in Polonia. Rerum abs te splendorem & magnitudinem totus terrarum orbis est admiratus. Haussisti inde ab ineunte ætate, diuinarum humanarumq; rerum cognitionem omnium: versatus es in varijs muneribus & aulis Principum: functus es legationibus amplissimis: idem semper fuisti temporibus diuissimis adiisti pericula plurima & maxima: nō in vmbra & ocio sed semper in acie & certamine es versatus. Hostes dominandi libidine inflammatos, potentia feros, vicinitate infestos, fama rerū gestarum formidabiles alijs, domuisti. Expertus est tua arma rebellis subiectus, grauius sensit Moscus: Turca timuit, Scy-



Scythia perhorruit. Ampla in patria munera, industria; honorificas legationes, fide & diligentia; Transylvaniam fortitudine, Poloniam consilio, omnia honoris insignia virtutes consecutus. Aucta est per te Polocia & Vielisio, Lituania: recuperata Liuonia, pacata Podolia, Mechmete & Aschlan Cherei Tartarorum Chanis perterritis, Podkoua & lancula Valachis castigatis, Amuratis Turcae minacissimis legationibus contemptis, omnium Regum, principum, & populorum nationumque ora in te sunt conuersa. Plena denique & referta sunt cuncta, magnificentiae, bonitatis, & religionis tuae; tot tantaque templa, Xenodochia, arces, aedificia erexisti. In victoria, quae superba & insolens est, te ipsum vicisti: Rex bello clarus, pace iustus, consilio grauis, animo inuictus extitisti. Sed finis sit. Bonorum enim Regum exaggeranda morte, mortis est Reipub. quasi initium: quae cum immortalis esse debeat, nefas est in vnius mortalis vita positam eam esse opinari. Te ego Deus Opt. Max. Regum & regnorum auctorem omnium, te, inquam, imploro & obtestor: ut quemadmodum hunc Stephanum Regem, per omnes omnium honorum gradus, ad regium fastigium euexeras, tot bonis auxeras, tot & tam praestantibus victorijs illustraras: ita ei defuncto, noxarum veniam, huic regno florentissimo Europae propugnaculo, illibatae domicilio libertatis, concordiam, Regem denique, iustum, fortem, prudentem, beneficum quamprimum nobis largiaris.

FINIS.

1912 Aug 301  
 Altera ORATIO  
 DE  
 STEPHANO  
 REGE POLONIAE &c.

pronunciata

A

*Nob. & clariss. viro,*  
 D. CHRISTOPH. STVRTZIO  
 J. V. D.  
 8. Id. Martij.





Illustri viro ac Imperatori  
STANISLAO PEKOSSLAVSKI  
de Pekosslavv Capitaneo Marienburgen  
Kierepecen Fravvenburgen &c. in  
Liunia Regio Legato

S. D.

CHRISTOPH. STURTZIVS

Liouus.

**Q**uanta virtutis vis & gloria sit, nihil apud te Virum  
illustrem & optimum, ut dicam, necesse est, qui viraq;  
Reipub: tempora, cum summa nominis tui commendatione a-  
quē tuopte ingenio quam praeclarissimo Stephani primi Regis  
Polonia iam pie defuncti exemplo gubernasti & adhuc regiē  
gubernas. Omnes, qui virtutis vim suspicimus & admira-  
mur, si alia officij et clementia, quae sunt plurima in Step-  
hano, argumenta deessent, gloriam utiq; virtutis et gratiam be-  
nemeritorum concelebrare debemus. Nec nos moueat inui-  
dia multa detrectans, pauca probans, sed auctori suo maxime  
perniciosa. Quis sapiens, quis fortis, quis iustus eius spicula  
non sensit? sic igitur τὸ καλὸν δύσκολον esse ait diuinus ille  
Plato; post fata tamen requiescit. Itaq; quod memoria  
optimi & praestantissimi Herois Stephani Regis Polonia,  
non ut debui sed ut potui tenuiter, hac oratione tuo nomini  
feliciter inscripta, tribui: id totum tuo patrocinio compro-  
batum iri ut scio, ita percipio maxime, ut rectis studijs ve-  
ram laudem constare, & nunquam sine invidia magnum  
existere solere putes.

Ceterum ego T. Ill. D. me totamq; familiam meam  
tuis amplissimis beneficijs, ut capisti, ornandam & augen-  
dam, qua possum animi contentione commendo; iusta me-  
orum studiorum officiorumq; facta testatione. Vale datis  
4. Cal. Septemb. de Rosiochio. Anno 87.

CHRISTOPHORI STURTZII  
ORATIO  
DE REGE STEPHANO.



Voties ego ad dicendum, Concio ornatissi-  
ma, augustissimum hunc locum ascendo: (ra-  
rius autem id aliquantò factum est, quam vel  
consuetudo Scholae patitur, vel mei instituti  
ratio admittit) toties mehercules vnum idemq; subuereor  
maximè; ne, dum ego studio quodam & certo eruditissi-  
morum hominum iudicio id suscipio, sinistros incurram  
quorundam Scepticorum sermones, & reprehensiones  
sustineam eò molestiores, quò indignius inferuntur.

Sed quis est qui optimè agendo inuidiam, & rectis  
studijs aduersa multa perferre non cogatur. Iam verò  
cum & autoritas Magnifici domini Rectoris dicendi  
copiam fecerit, & ratio suscepti muneris hoc ipsum re-  
quirere videatur: excusationem meam sine dubitatione  
vos accepturos spero. Turpe enim existimant, qui in  
iudicijs agunt: indecorum omnes artifices putant; qui ad  
delectationem aurium & eruditionem animorum artem  
suam componunt, rem ipsam absq; aliquo procemio pro-  
posuisse. Quid igitur nobis in re tam seria, tam augusta,  
& prope diuina versantibus, nonne pudori esset, si illo-  
tis, ut aiunt, manibus sacratissimæ rei interpretationem  
susciperemus? Cogito enim id aggredi, quod ex usu  
scholæ & ex salute multorum esse possit, ut cuius rei gra-  
tia hi, quos videtis, peregrini optimæ spei adolescen-  
tes huc venerint, & apud vos viuere debeant, cum auto-  
ritate vestra, præceptores & amici obseruandissimi, con-  
stituta; illis explorata, & parentibus eorum grata ratio

D 2

con-



constare possit. Quamobrem cum causam dicendi vobis exposuerim, sic tandem vestris tenerrimis auribus, concio ornatissima satisfacisse me puto, ne vel arrogantiae vel quo alio crimine nos condemnetis, qui officij ratione cuncta facimus, & cum aliqua vestri commendatione virtutis laudem quaerimus.

Vna enim eademque perpetua nobis, in omni vita nostra, via proposita est; quam tamen nostramet. Marte nos ingredi non posse facile agnoscimus: sed aliunde opem manumque ducricem petendam, quod vero rectius, quam ab altissimo & sapientissimo Deo? statuimus, ut pietatis Christianae veris fundamentis cognitis, honesta, iusta, recta & pulchra discamus, & ut vno verbo multa complectar, virtutis exercitia perpetuo & constanter usurpemus. At quam haec longa, quam difficilis, quam periculosa via sit, quis, nisi rerum omnium ignarus, & qui dulces honestatis fructus nondum percepit, ignorat? Labor enim non solum ingens & indefessus ad virtutem rectaque studia anhelanti, propositus est: quem plerique velut pestem valde incaute fugiunt, qui tamen diligentia, omnium virtutum matre, vinci potest: sed & difficultas in assequendo & in adsecutis gravitas cum virtute coniuncta esse debet; ne quod longo tempore magnoque labore comparatum habes, vno momento totum amittas: vel voluptatibus blandissimis dominabus victus: vel caeterarum rerum sollicitudine impeditus hanc virtutis curam abijcias. Constantia ergo animi opus esse & admonitore fidelissimo videtis.

Primum quod est & summum in re omnium optima & pulcherrima, certis tum Theologorum, tum philosophorum praeceptis dari & doceri scitis. Sed tamen in altero quandoque hominis praecellentis autoritas plurimum

num valet, quandoque exempla praestantissimorum heroum non minimam vim obtinent: quinimo vitam nostram exemplis magis & facilius quam exemplis institui & gubernari posse ac solere, in comperto est. Quapropter cum hoc tempore ea potissimum mediter, eaque ingenuis adolescentibus, fidei meae singulariter commendatis, tradenda constituerim, quae & vitae recte instituendae veram rationem continent, & hominum mores atque studia maxime excolunt: nullum sane, pro felici operis instituti primordio, commodius, nullum vtilius, nullumque ad imitandum vehementius argumentum, tum eruditionis comparandae: tum virtutis exercendae inuenire posse videbar quam si, quem regem vere magnum patremque patriae viuum cognouimus, iusta iam pie defuncti celebratione, velut quoddam exemplar virtutis ad imitandum proponeremus. Ad vos autem, O Liouonij, & Borussii, nostra imprimis dirigetur oratio: ut, quem regem optimum habueritis, grato animo agnoscat, non modo suae aetatis principem ac regem laudatissimum: sed cuius etiam desiderio ita teneamini, ut de successore bono & huic aequali vota nuncupantes, hanc vobis stationem hoc tempore commissam existimetis; ut, exemplo praestantissimi herois accensi, omni studio ac contentione id efficiatis, ut optimus Rex vestigia virtutis in animis vestris posuisse, nosque omnes ad iustitiae prudentiaeque cultum priuatis documentis excitasse videatur. Si quid vobis etiam Germanis, illi, quam studetis, disciplinae in hoc nostro Rege Stephano consimile visum fuerit, si quid virtutibus Imp. Rom. egregijs aequale: agere, quantum vobis in tanto praestantissimorum heroum Germania cumulo licet, ad imitandum multa, ad agendum plurima ut sunt, desumite; & forte honorificum valde vobis erit, si regem nostrum virtute



tute & iusticia superaueritis. Dicam ergo paucis; multa enim in tam exiguo temporis spacio non licet: nec etiam de omnibus inquirere lubet; dicam de magno Stephano rege Poloniae, Magno Duce Lithuaniae, Principe Transylvaniae Liuaniaeque &c. non quantum praeclara eius dignitas & virtus excellens postulat, sed quantum mediocritas ingenij mei patitur. Nec enim, si eruditissimi etiam homines omnes ingenij animique vires intenderent, satis dignè maximas ipsius laudes cognitae celebrare possent; quanquam plurimi sint, quos hoc vno argumento occupatos esse audio; ut, quod ego plenè non attigero, ex illis copiosè cognoscere possitis.

Inter cetera, quae DEVS Opt. Max. homini tribuit, vitae munera, non hoc minimum, quinimo dignissimum est beneficium, quod ratione uti possumus; qua non solū reliquis animantibus omnibus praecellamus, sed inter homines etiam augustissimum locum & honores maximos consequamur, namque si veri rerum aestimatores esse volumus, non sanguinis splendore, nec auita paternaque sed sua cuiusque propria virtute vera dignitas aestimanda esse videtur. Itaque illi mihi perbeati esse intelliguntur, qui hanc subductam vereque praeclaram aetatis suae rationem ineunt, ut à puero ingenuis artibus sese dedant; quibus instructi instrumentisque eloquentiae comparatis, ea, quae à sapientissimis hominibus ad bene viuendum tradita sunt, & discant diligenter, & exerceant prudenter.

Planè hanc ipsam rationem Regem nostrum Stephanum à prima statim adolescentia tenuisse, etsi id literis traditum me legisse non memini; tamen consequentia egregia eius facta & honestissima studia rerum praeclare agendarum satis abundeque testantur, quam ille virtutis amator egregius fuerit, quantoque discendi studio arserit; qui

qui & puer in sua patria, honestinae & nobilis familiae exemplo admonitus, rudimenta prima didicit, & aetate paululum progressus longas peregrinationes suscipere magnaque itinera conficere non dubitauit, ut, qui tum temporis, in omni terrarum Hungariae, Italiae, Germaniae parte, celeberrimi principes viri togati militiaeque fuerunt, & coram eos videret, & familiarissimè iisdem vteretur.

Sed ne incunabula omittam praestantissimi Herois, cuius iam studia inquirimus, natus est ex illustri familia, parentibus utique honestissimis: sed ex fortunae inuidia non ita opulenti, ut tantum virum decebat; & fortè melius. Vidimus enim multos principes, admiratione suae profapiae magnaque facultatum opumue copia praepeditos, raro virtutis opus arduum & difficile cogitare; postquam in molli isto vitae genere consueuerunt. Quod tamen citra inuidiam dictum velim. Nam ratio verae virtutis id aliquando exprimit, quod pudor subiectionis & reuerentia obtegere solet.

Natus est igitur Rex Stephanus patre Stephano Batto-reo Palatino Transylvaniae, matre Catharina Thelegdia, in Hungaria loco suae ditionis celebri Somlio V. Cal. Oct. Anno 1533.

Quae autem adolescentiae ipsius studia fuerint, quibusve praeceptoribus usus sit, cum singula, nobis obiter cuncta attingentibus, explorata non sint, manifestò ostendere non possumus. Id tamen ex virtute eius singulari, prudentia & eruditione propè admirabili apparet, non solū in Stephano vim ingenij diuinam fuisse; sed tantum praeterea studium, ut multis admirationi sua aetate fuerit; nobis etiamnum exemplo sit, ut persuasum certò habeamus, familiae dignitatem nequicquam nobis proficere, nisi



nisi virtutis diligens cura accedat, nec tandem absq; illa  
rite conseruari solere. Deinde nullam rem laude dignam  
effici posse, nisi & cupiditas discendi animo inhæreat, &  
studium exercendæ virtutis maneat perpetuum. Sic ergo  
facile intelligimus, vnde illa, quæ in rege nostro præcipue  
laudatur virtus, iusticia, profecta sit, quoue fundamento  
innixa, immota constiterit.

Nisi veram definitionis iusticiæ interpretationem te-  
neretis, auditores suauissimi, hanc, ex instituto regis no-  
stri Stephani, non inconcinnam vobis demonstrarem.  
Qui iusticiæ professionem laudemq; appetit: (omnes au-  
tem qui sacerdotes eius, principes simul & Icri, perhiberi  
volunt, summopere appetere debent) id eniti maxime  
velit, vt animum, à primis (vt aiunt) vnguiculis, sanctissi-  
mis Theologiæ & Philosophiæ præceptis instructum ha-  
beat, & quæ præclara didicit, non alia, nec diuersa, sed  
ea ipsa agere & factis exprimere instituat. nec enim fieri  
potest, vt qui primum ætatis florem vitijs mancipauit, im-  
potens iam & effatus, virtutis actiones digne vsurpare  
possit. Nam virtus perpetua est & sibi maxime *ἑμὴ ἑκείνη*  
& consentanea actio. Quare diminuenda est eorum opi-  
nio, existimantium satis esse ad virtutis laudem veramq;  
dignitatem consequendam singulari & præclara rerum  
scientia præditum esse. Sed quemadmodum omne si-  
mulatum diuturnum non est: sic illi vmbra veræ laudis  
cum sua multorumq; perniciæ sequi videntur, tantò celeri-  
us euanescentem quantò se suamet opinione pulchriores  
esse existimant. Vos autem iuuenes ita habete, qui non  
veris solidisq; fundamentis domum extruxerit, nec veram  
virtutis & eruditionis comparandæ rationem secutus  
fuerit: pari conditione esse, vt, quo minime sperant  
tempore tamquam flosculi, aduersis fortunæ telis petiti,  
misere

miserè simul & cum pudore decidant.

Hoc ergò prima vestræ adolescentiæ educatio primaq;  
institutio, Iuuenes nobilissimi, spectat; in qua omne fe-  
licitatis humanæ momentum consistere, Plutarchus locu-  
ples testis est; vt comparata primarum artium lingua-  
rumq; cognitione; his velut *τοῖς μέοις* & instrumentis, sic  
philosophiæ præcepta discatis, vt quocunq; genere do-  
ctrinarum eruditi fueritis, magna in vobis spes virtutis  
posita, & ad ecclesiæ atq; Reip emolumenta vestramq;  
salutem, accommodata esse videatur.

Nec est, mi adolescens, quod verearis, quin, vbi ita  
præclare multa didiceris recteq; agere institueris, gloria te  
virtutis certissima comes, fugientem vltro etiam conse-  
quatur. Tanta enim virtutis vis est; vt, licet paupertate  
obtegatur, inuidiaq; telis aliquandiu opprimatur, & pro-  
pter tantas tamq; acerbis difficultates, quæ circa eam stant  
solitaria esse relicta videatur: nihilominus tamen suâ se  
potentiâ erigat & in tenebris miseriarum eluceat, & liuo-  
ris igne accensa, quò ante grauius oppressa fuit, eò splen-  
didius emineat. Quemadmodum id Ouidium lib. 5. Trist.  
elegantissimis versibus expressisse meministis.

Scilicet aduersis probitas exercita rebus,

Tristi materiam tempore laudis habet.

Si nihil infesti durus vidisset Vlysses,

Penelope felix, sed sine laude, foret.

Non ergò solùm ob eam, qua omnes nati sumus,  
iniquam vitæ conditionem, sed propter hanc ipsam vir-  
tutis laudem tuendam & rite consequendam, multa ad-  
uersa, heròico tamen & forti animo, Rex noster Stepha-  
nus eo modo pertulit; vt, postquam tum literarum studio  
laudabili: tum bellis grauissimis & periculosis con-  
ficiendis multos magnosq; labores exantlasset, *τέφαινον*,

E

ceur



ceu præmium virtutis, delato sibi regno Poloniæ potentissimo simul & florentissimo, consecutus sit. Sed quàm magno sibi ille honor constiterit, non dicam de electionis, quæ gravissimo multorum dolore incidit, difficultate sed hoc vnum si consideraueritis, quale & quo tempore sibi regnū administrandum commissum sit, iam vos rem omnem tenere arbitror. Difficilia mehercules & periculis omnia plena, vndiq; hostibus regno imminuentibus, tum temporis fuisse constat, quo Regi nostro gubernacula rerum tradebantur.

Sapiens, mediis fidiis, consilium Polonorum fuit, qui virtute hæc omnia superari & prudentia posse existimabant, non viribus, non autoritate, non potentia cuiusq;, & idcirco præstantissimum & rebus feliciter gestis clarissimum herodem & Regem suæ libertatis propugnatorem suæq; salutis defensorem sibi delegerunt, & Stephanum nostrum Calendis Maij anno 1576. diademate regio cinxerunt. Primum sanè, quod huic sapientissimo & fortissimo Imperatori imponebatur, onus gravissimum simul ac difficilimum, patria mea Liuania suis miserrimis temporibus malisue cumulatis ingerebat. Scitis omnes; testimonio in re certa & aperta minime opus est; quàm florentissima olim & rebus omnibus abundans Liuania & quidem abhinc trecentos & amplius annos fuerit, & quomodo sua vbertate multas finitimas pariter & remotissimas quoq; regiones; frumento, melle, cera, lino & cæteris id genus humanæ vitæ maximè necessarijs bonis, exhibuerit. Profecto cogitatione felicitatis status patriæ & quod iam in tot pericula, mala, calamitates, clades & miseras coniecti sumus, meritò indies magno cum animi dolore mæremus. O Liuanij: patria est, qua nihil dulcius, nihil iucundius Deus immortalis hominibus dedit,

ea nunc direpta iacet, omni ferè libertate antiqua, iure & felicitate sua exuta, ergone nos beati esse videmur? Vix est, ut à lachrimis me temperem: turbata enim omnia sunt, fluxa & incerta. Sed reuertamur, vnde digressi sumus. Nostra quidem ætas tranquillum patriæ statum nō vidit, quin imo in ipso calamitatum ingressu nati sumus & in summis istis angustijs educati: attamen summam terræ vbertatem vidimus, felicitatem in pace maximam omnium rerum fuisse accepimus.

Dices ergo quæ tantæ conuersionis causa? Illa ipsa certè, quæ omnium florentissimarum regionum & ciuitatum iam oppressarum & deuastatarum causa fuit & esse solet. Superbia & discordia. Fatemur enim in quo culpam agnoscimus; occinimus alijs: ut quos eadem vitia vrgent, exemplo nostro prudentissimè sibi caueant.

Quoniam igitur maiores nostri rebus suis optimis fortunam reuerenter non habuerunt, sed eā nimium suffragante abusi sunt, eius sanè instabilitatem nostro cum maximo incommodo posterius experti sumus: ne interim dicam, quod aures omnium iam compleuit, peccata nostra, quibus Deum multifariam offenderamus, nostri tanti tamue diuturni mali primam atque præcipuam causam fuisse. Nam propter peccata populi DEVS transfert imperia de gente in gentem. Certè verum est, quod Xenophon sapientissimè dixit, multò difficilius esse rebus secundis moderatè uti posse, quàm aduersas æquo animo perpeti. Nam hæc modestiam animis quorundam persuadent; illæ insolentiam cum fastu omnibus ferè ingerunt. Itaq; cum omnia tuta, libertatis plena & longè felicissima essent, id, quod sapientissimus ille Cato diruta Carthagine, Romanis rerum gerendarum laude alioquin præclaris



euenturum prædixit, nobis eadem ratione euenit. Principes enim terræ, cum à finitimis bellis securi essent, inter se lites primum de iurisdictione, mox arma mouerunt & qui potentior ceteris erat, sibi omnia licere arbitrabatur, volens *ἀνὰ ἀρετὴν καὶ ὑπεροχὴν ἐμμεναὶ ἀλλῶν*; altero interim ex vetustate acquisitionis & prærogatiua iuris spiritualis suam potestatem defendente. Quid tandem? Postq̃ insolentius magister ordinis Theutonicus agere instituisset, & ad se omnia pertinere deber eedixisset, & Archiepiscopo Gulielmo oppresso & ceteris, qui cum ipso sentiebant, male adfectis: (namq̃ & mea familia non minima ex periculosissimis huius intestinae dissensionis malis incommoda accepit:) profectò indignitas rei multos, ad quos ea res pertinebat, plurimum commouit.

Imperatoris Romani Ferdinandi, cuius maiestati parebant tum Liuoni, per legatos certos & præstantissimos homines, anno 1557 die 18 Maij id afferentes, decreto iubebatur Magistro ordinis, vt restitutionem spoliato Archiepiscopo faceret; promissa ea quidem est, sed nondum completa, & ego meiq̃ fratres adhuc eam dolemus. Quid multis? eò tandem res inclinata est, vt cum acrius Moschus bello infestissimo immineret, nec suis viribus satis confiderent prouinciales Vltradunensis districtus, excepta ciuitate Rigen, alijsq̃ alios tum quærentibus dominos, imperium Polonicum agnoscerent, eiusq̃ se tutelæ & patrociniò, non tamen planè potestati, subijcerent. Sanè hoc ipso tempore Illmi. principis ac Domini, Domini Gothardi Ducis Curlandiæ moderatio singulari cum prudentia & virtute coniuncta eo modo apparuit, vt & tranquillitatem Liuoniæ mediocrem attulerit & sibi æternum perpetuæ in sua familia inductæ dignitatis monumentum pepererit. Sed tamen Moschus tyrannus,

quam

quam semel ex dissensione principum Liuoniæ occasionem rei gerendæ commodissimam nactus erat, non omisit; vt quorum ante fortitudinem & potentiam sub magistro præsertim Plettenbergio horruisset, eos iam securos & discordes opprimeret, nec infelicitè sibi ea res cecidit; velut id calamitas Liuoniæ testata est.

Itaq̃ non solùm fato versari res humanas videmus, verumetiam ex culpa & negligentia hominum pleraq̃ mala euenire scimus; Deo ita disponente, vt quæcunq̃ accidunt, iuste & meritò nobis accidisse videantur. Hoc ergò fuit initium maximorum malorum, quorum definitum modum necdum tenemus. Hæc mutati felicissimi status ratio; tantò mehercles infelicior, quantò vindictarum libertatis pauciores sunt reliquiæ. Sic enim per 20 amplius annos à Socijs nostris defensi sumus, vt desertos nos magis fuisse, quàm tutos, solos quàm cum exteris coniunctos optandum esset. De vitijs hominum loquor. Ad Stephanum virtutis veræ exemplar redeo.

Quoniam boni est regis ac principis, tantam pro salute & defensione suorum curam suscepisse, vt nullis sumptibus parcat, nulliq̃ labori cedat, quin omnes suæ maiestati commissos populos saluos & incolumes retineat & conseruet, quemadmodum id Homerus fons ingeniorum in persona Agamemnonis expressit, *βέλομαι ἐν ἅλῳ σὸν ἐμμεναὶ ἢ δατολέαχ*. & venustè ait Seneca.

Pulchrum emînere est inter illustres viros,  
 Consulere patriæ, parcere subiectis, & fera  
 Cædè abstinere, tempus atq̃ iræ dare,  
 Orbì quietem, seculo pacem suo.

Nihil sane huic regi nostro fortissimo prius, nihil antiquius fuit, quàm vt Liuoniam miserè deuastatam, à socijs relictam & inter se maximè dissentientem recolligeret.



ret, & in pristinam libertatem, data pace & tranquillitate, adfereret. Et profectò summa, quæ tum ingruerat & totam prouinciã prægrauabat, violentiã & tyranni inaudita, necessitatem quidem regi imposuit, vt quàm celerrimè posset, malè affectæ & laboranti prouinciæ opem ferret. Sed tamen Regiæ maiestati eius satius visum fuit, hostem truculentissimum quamuis, & immania designantem, qua posset ratione, sustineri; vt ante ea, quæ in ipso regno exarserant, mala sedaret, quàm vt finitima vrgeret. Interim autem Moschus nihil cunctatus, totam Liunioniam suæ potestati subiecit; & quidem tam admirabili fraude & astu, vt qui Germanos homines rerum omnium expertos, ab eo, qui barbarus fuit, falli posse dixisset, pro ea imprudentia pependisset. Sed tamen ille omnium cogitationes consilio anteuertit, & omnium vires celeritate rerum gerendarum fregit metumq; sui maximum etiam longiùs disitis regionibus iniecit. Non est ergò, quod hostem etiam minimum & imbecillum contemnamus: & in bellis qui fidem expectat sibi præstari, suæ credulitatis maximam sæpenu-merò pœnam luit.

Quanta autem anno 1577. in Liunionia miseria, quanta calamitas; quantus in omnibus non locis modo & vrbibus, miserè direptis, fraude & proditiõne occupatis: sed in omnibus etiam familijs tum nobilium; tum plebeiorum, luctus fuerit: nec, mihi si centum linguæ sint oraq; centum, satis accuratè edicere possem.

Iohannes Basilius tyrannus Moschouitarum elegerat sibi adfinem fratrem potentissimi Regis Daniæ Domini Domini Friderici 2. optimi, & tam occulto consilio, vt, quò summa in illum collata beneficia, honoris præmia & illa

illa summi decoris loco habita Regis Liunioniæ nominatio spectaret, iuuenis rex Magnus, nec per se ipse, nec ex suggestione consiliariorum suorum ante aduerteret quàm id totius prouinciæ Liunioniæ irreuerabilis calamitas & rerum omnium desperatio, in ipso rege Liunioniæ, testata est.

Multi quidem sunt, qui nos vituperant, quasi primores patriæ nostræ relictis arcibus profugissent, sed hi veram omnium rationem tenere non videntur. Nonne scitum est illud Pythagoræ, *διωπίς ὃ ἀνάνης ἔργον εἶναι*; tamdiu me hercle quid possumus, quàm diu necessitas nos aliud facere non cogit. Quos ergo hostium oppressit multitudo & potentia, hi ne fugisse intelliguntur? quid? paucos inermes in tela parata currere, nonne extremæ dementiæ est? Itaq; sub certa vitæ retinendæ conditione semet seruasse; maximè sociorum fide & ope multum planeq; cessante; satius fuit, quàm stulta & temeraria audacia tanto hosti, qui vltra ducenta millia hominum in exercitu habuit, se se opposuisse. Quàm vero aliena ab tyrannico Moschi imperio voluntas eorum fuerit, satis, mehercles, hi testatum fecerunt, qui mortem, puluere tormentario substrato, sibi consciscere maluerunt quàm in manus tyranni peruenire: rectissimè statuentes, nec salutis rationem habendam sine dignitate, nec dignitatis sine salute. Ergo Rex Stephanus, quamuis & potentia crudelissimi hostis socijs nocitura aduerteretur, & Liunionij humilima obtestatione facta peterent, ne rex sui curam abijceret, sed quanto ocys posset auxilio sibi & subsidio exercitum instructum mitteret: tamen rebus nondum apud Dantiscum urbem expeditis, auxilium sacrum laboranti prouinciæ ferre, non



non suo quidem proprio consilio, sed prorsus alieno, recur-  
savit. Nam intellexit, proculdubio, rex sapientissimus to-  
tius Reip: procuracionem, non certæ alicuius partis, sibi  
commissam; ut qui vnius membri curam abijceret, iam  
totum corpus curasse non videatur. Quare non incre-  
dibile est, quod quidam de eo adserunt, poenituisse regem  
facti, quod potius Dantiscum obsidere, quàm Liunionæ  
malis succurrere voluerit. Sed ita fortè in fatis fuit, ut  
quæ diuinæ ultionis exemplū esse deberet, Liunia sic ad-  
fligeret, ut nulla sui parte constitisse intelligatur. Tandem  
tamen virtute singulari & magnanimitate, *μηδὲν ἀναβάνο-*  
*ν* cum id, Deo conatus prosperante, commodissimum  
videbatur, deuictis expulsisque è Liunia hostibus pristi-  
num ius adseruit. Quàm prosperè autem & prouiden-  
ter Rex Stephanus, Illmo. principe ac domino domino  
Ioanne Sammoiscio, magno regni cancellario, belli duce  
designato, bellum Moschouiticum gesserit, confecerit, nō  
est huius loci commemorare, quoniam & res in conspe-  
ctu propè nostro gesta, omnibus est manifesta, & monu-  
mentis historiarum Polonicarum satis superq; descripta.  
Quemadmodum igitur virtute optimi ac fortissimi Regis  
Stephani ex manibus Moschi excussa veluti, & recupe-  
rata aliquatenus est patria nostra: Sic ô Liunionij intelliga-  
mus, nos et dignitatem pristinam, & illam, quàm maiores  
tradiderunt fuisse, felicitatem recuperare aliter non posse,  
quàm si virtute non sanguine, Deo non hominibus nita-  
mur, & pietati atq; iusticiæ, summa cum animi conten-  
tione, studium demus.

Hoc sane si Liunionæ noua propago, ut laudabiliter ce-  
pit, agere instituerit, non est dubitandum, quin omnibus  
malis liberati sub alis albæ aquilæ, relicto nobis veræ reli-  
gionis cultu, tutò tandem viuere possimus, modò in pri-  
stina

stina vitia, quæ hanc vim habere nouimus, ut sui cultores  
exspuat & summis miserijs adficiat, rursus non incida-  
mus, sed reuertatur, vnde deflexit, oratio. Quod in  
principe, pastore populorum, commendatur, quodue  
officium Imperatoriæ maiestatis esse Iustinianus noster  
adserit, hoc ipsum in rege nostro singulariter celebramus,  
quod videlicet, quemadmodum de Agamemnone Ho-  
merus testatur.

*ἀμφοτέρων βασιλεὺς τ' ἀνδρὶς κρατὶς ἀίχμητ' ἦν*  
fuerit h. e. vtraq; Reipub. tempora pacis & belli, summa  
cum prudentiæ laude & virtute gubernarit.

Tanta enim in bellis gerendis scientia militaris, virtus,  
fortitudo & prudentia in Rege Stephano commendatur  
fuisse, ut qui eū summis veterum Roman. Impp. compa-  
rauerunt, nondum satis eius laudibus tribuisse videan-  
tur. Omnis ille laboris patientissimus fuit, nec æstus  
tantus, nec frigus tam strictum erat, quo ille occasionem  
rei gerendæ omitteret. Tanta præterea prudentia in ca-  
stris mouendis & stratagematis inueniendis omnia dispo-  
nebat, ut, qui in eius militia vixerunt, eruditos sese in re  
militari huius regis exemplo fateantur. Rursus tanta in  
pace laus iusticiæ in ipso fuit, ut improbis & seditiosis  
hominibus terrori, bonis autem honori, exteris populis  
admirationi fuerit, & quoniam iusticiam dilexit, fouit,  
exercuit; ceteræ quoq; virtutes in ipso non desideraban-  
tur. Rebus secundis se se non efferebat; quinimo nullam  
rem magis odio habebat, quàm superbiam; ergò humi-  
litas in ipso commendata est. Pudoris autem tantus  
apud ipsum honos fuit, ut causam propinquam morti  
eius tribuisse dicatur.

Tanta præterea eum humanitate fuisse, ipsi, cum esse-  
mus Grodnæ anno 79, vidimus, quanta vix alium re-



etius optare posses principem; siquidem omnes Regis nomen inclamantes audire, omniumque libellos supplices sua manu, nonnihil consistendo, quoad porrigentur, accipere non recusauit: nec tamen postea neglexit; ut in quibusdam aulis accidere miseri clientes conqueruntur; sed inter prandendum quandoque; quia alia tempora feriis Reipub. negociis tractandis & curandis destinaret, legebat, cognoscebat; rescribebat, ut intra triduum quin datum esset responsum, nemo dubitare posset. Agnoscamus ergo singulare Dei beneficium, in hoc rege dato, nobis exhibitum: qui & ipse Remp. sapienter gubernauit, & optimam constituendam moderandamque Reip. rationem suo exemplo docuit, duabus nimirum rebus humanæ vitæ & societatis tuitionem constare, legum scientia, armorumque peritia, & vtriusque rei usu certissimo: Diuinum ergo bonum hic Rex sapiens & fortis fuit: nam, ut ait Homerus, *ἡ μάλα κρατερός δὲ θεός πᾶσι τὸν ἔδωκεν*. vna breui sententia subindicans, vnde boni reges ac fortes principes dentur & cuius gratia diu salui & incolumes existere possint. Quod verò Liunioni saepe multumque de hoc rege iustissimo conquesti sunt & grauiora sibi impendere Metropolis prouinciæ verita est: id non tam Regis nostri culpâ, qui natura bonus æquique amantissimus fuit, quàm partim vitio hominum inuidorum nostræque religioni aduersantium: partim *φιλονεικία* res publicas negligentium, factum esse existimamus. Id sanè fateri cogimur paternam Liunioniæ curam regem Stephanum suscepisse, qui non solum eam è faucibus Moschi eripere, magno suo labore, multoque suorum militum fortissimorum nobili sanguine profuso: sed etiam legibus iudicisque constitutam certam eius & tranquillam Remp. esse voluit. Sed quod omnia ad finem optatum non peruenierunt, multa

tum

tum temporum infelicitate, tum hominum maleuolorum perfidia factum est. Interim tamen memoria & rerum ab ipso felicissimè & fortissimè gestarum, & prudentissimarum constitutionum commemoratio apud omnes posteris perpetua erit, ut quoties in eius mentionem deuenimus (indies autem non absque magno desiderio incidimus) toties nuncupatis votis Deus Opt. Max. exorandus esse videatur, ut non dissimilem Stephano regem alium dare & benignè largiri dignetur; cuius pietate, prudentia & felicitate Resp. floreat, ciues opibus magni, virtute præclari, concordia felices efficiantur; & totius Reip. gubernandæ hæc ratio ineatur, ut potentissimus Rex Poloniæ, hostibus terrori, amicis subsidio, finitimis exemplo esse possit. Nimis mehercules maturè hic nobis rex optimus & fortis, è vita sublatus est, & quidem nos in medijs turbis bellorumque tempestatibus veluti Orphanis relictis vicem nostram dolemus, hostis Moschi impetus tyrannicos horremus, & nostram indignitatem mæremus, quod Deus hunc nobis Regem diutius relinquere noluit, cuius opera, studia & officia Ecclesiæ & Reipub. magno, sine dubitatione, usui esse protuissent. Optimus ergo rex Stephanus, prohi dolor 4. Non. Decemb. secundum veterem apud nos retentam anni computationem, anno proximè elapso 86, cum decem annos regnasset, circa horam 12 noctis, Grodnæ vitam cum morte commutauit, ita placidè, ita suauiter obdormiens, ut ad meliorem vitam veramque animarum requiem transportatus esse videatur. Interim de singulis rebus, religionis præsertim, nec iudicandi nec dicendi partes nobis adsumimus. Id medijs fidius adfirmare non dubitamus. Singularem Dei beneficio hunc regem Stephanum, pro oppugnaado & domando tyranno Moscho, cunctis populis Sarmaticis, in quibus Deus suæ

F 2 Ecclesiæ



ecclesiae reliquias non exiguas habet, excitatum, datum & tamdiu nobis conseruatum fuisse, quamdiu id venerandae & sanctae Trinitati utile & ecclesiae suae saluberrimum esse visum est.

Eram ego illo tempore, quo Rex Stephanus mortuus est, Regiomonti, non priuato sed publico nomine, nec enim vos latet, quod ad professionem Iuris in Academiam Regiomontanam vocatus, tantò certiore spe rerum ex animo conficiendarum profectus sim, quantò mihi maior certiorq; ex mādato Illmi principis ac dōini Domini G. F. Ducis ac Curatoris Prussiae, fides promissioq; à tātō viro facta est, in cuius verba iurare, nedum fidem eius sequi maluisses, sed non omnium grata est apud vos consultatio.

Non tamen negarim, quin utrobique πᾶσι ἀνθρώποις perspiciatur; vt nostrarum consultationum vel praecipuum impedimentum saepenumero sit illud, cui maximè fidimus: quia Deo non omnem laudem tribuimus, eius rei si quis petit exemplum, legat historias vitae humanae magistras, & maiora etiam opinione sua cognoscet.

Quamobrem nemo sibi nimitum praefidat, cautio est, quia nescit, an adijciant hodiernae crastina nobis tempora Dij superi: & nunquid non πᾶσι ἀνθρώποις καὶ τοῖς θεοῖς vt venustè in Tragœdijs saepè repetiuit Euripides. Casus ergo humanae vitae lugemus. Quicquid enim humanum est, id aliter euenire posse existimandum est: Vita & spes id dat, quod mors & inuidia eripere potest. Lugemus omnes regem fortissimū & sapientissimū nobis ereptum; & meritò lugemus. Viuum enim exemplar virtutis atq; iusticiae fuit, quod ipsum factis simul expressit dictisq; testatus est. Itaq; silentio praetereundum non est apophtegma illud, quod iamdiu vestras aures per sonuit.

Cum

Cū nostri aduersarij, qui vitae aequè atq; religionis nostrae tràquillo statui inuidēt, multis persuadere regi Stephano vellent: vt, qui vno paritq; iure; ob difficiles & argutas disputationes euitandas, quas disparitas legum in controuersis progenerat; omnes vti subditos. vellet; eadem ratione religionis vnum eundemq; cultum, secundum morem & traditionem Romanae ecclesiae, in omnibus sui regni partibus, esse vellet: piè sane et sapienter respondit. Rex sum populorum, non conscientiarum, subindicans non minus eos in pace tuendos, qui ex verbo Dei suam religionem stabilitam adserunt, quàm qui eam humanis traditionibus & autoritate maioris cuiusdam dignitatis pertinaciter defendunt. Aliud praeerea apophtegma referam, quo superbiam & insolentem fastum arguere Rex sapientissimus voluit. Cum ad bellum Moschouiticum conscriptus miles congregaretur in loco definito, ex eo numero veniebat quidam eques nobilis Polonus septem equis stipatus & veste magnifica valdeq; splendida indutus, se in conspectum Regis, per fenestram cuncta conspicientis, fistebat. Hunc visum Rex è vestigio ad se vocat rogatq; quot ille ad bellum equos expediuisset. Septem respondit; at ego, inquit Rex, hac veste mutata octauum adderem maiusq; stipendium mererem. Ille quidem pudore suffusus à facie Regis subtristis discessit, sententiamq; meditando intellexit, non in vestitus elegantia sed in animi robore veram laudem fortitudinis consistere, atq; vt alij fastum omnem inanem fugerent, exemplo sanè oportuno fuit.

Sed si singula, quae in hoc rege omnia admirabilia fuerunt, perquireremus, tempus nos prius, quàm res praeclarae de Rege Stephano commemorandae deficerent. Itaq; si vnū proposuero adhuc singulare, dicendi finem faciam.

F 3

ciam



ciam. Nobiles ille viros aliosq; literis bonis eleganter eruditos singulari amore & beneuolentia complexus est, honoribusq; pariter & premijs auxit & ornauit: est nobis huius rei argumento, praeclara illa dignitas & prouiso Cl. V. Domini Pauli Otterbornij pastoris Ecclesiae apud Caunenses, amici nostri studiosissimi, cui Rex in castris lauream donauit; ut est Poeta elegans & eruditissimus vir, & in omnium conspectu literarum honorem testatus est. Et quos Rex Stephanus singulari virtute praeditos cognouit, eosdem, ut quo cepissent gradu, persisterent, nec vlla se ratione a virtutis statu dimoueri paterentur, non minus exemplo, quam sermone pulcherrimo admonuit; idipsum quod Cyrus filijs, militibus suis inculcans, *ὁδὲ μία ἔστω ὅτι καλὴ παραίνεσις, ἢ ὅτι μὴ ὄντας ἀγαθὸς, αὐθιμέρον ἀκρίβειαν, ἀγαθὸς ποιῇ. ὅτι ἂν ἔν ποῖοις γε, εἰ μὴ ἐμπροσθεν τοῦ μεμελετημένος ἔστω. ὁδὲ ἀκρίβειαν, ὁδὲ μὴ ἰσχυρῶς γε, ὁδὲ μὴ πᾶσι γε σώματα ἱκανὸς ποιεῖν, ἢ μὴ πᾶσι γε ἡσυχίαν ᾖ.* Quae verba latine ita proferre possemus. Nulla tam est praeclara & efficax admonitio, quae simul atq; enunciatur, eos, qui boni non sunt, vno die bonos efficere possit. Itaq; non tela recte iacent, qui non multo ante didicerunt, nec hi sagittis, neq; equis recte vtentur, nec corporis labores probe sustinebunt, qui non ante ijs rebus bene exercitati fuerint, Naturam enim qui virtutis cognorat, facile, quod ex usu tum hominum tum Reip. esset, intelligebat: nec eum praeteribat, quam beata illa Respub. esse soleat, in qua sapientes praesunt populo, & virtuti sua laus tribuitur. Quam rursus misera & prope deploranda Resp. ea sit, in qua nullus sapientiae, pudori, & literis bonis locus relictus est. Hic enim omnia ad interitum spectare ipsa ratio persuadet, illic vero omnia fore beata ac florentissima, & natura virtutum, quae perpetua

petua est, & ipsa rerum magistra experientia comprobat. Quapropter nihil magis studiosum in rebus humanis, nihil dignius, nihilq; praeclarius videri nobis debet, adolescentibus studiosi & optimi, quam ut iusta, recta & vilitate autoritate sapientum virorum: tum exemplo heroum & praestantissimorum hominum discatis, & pro vera dignitate consequenda, opere felicissime compleatis.

Sanè quoties ego animo mecum reuoluo felicem huius regionis administrationem; & quomodo optimi nostri principis Domini Vldarici Ducis Megapolei, &c. virtute, sapientia, pietate, tam laeta, tam diuturna, tam vbere pace fruamini, non possum non vos beatos dicere. Et sanè Vldaricus optimus princeps & in Ecclesiam Christi & in Remp. singulari fide, animo & beneuolentia, suae humanitatis, gratiae & sapientiae fructus ( ut nomen factis plane respondeat ) ad alios quoq; populos finitimasq; regiones pertinere facit.

Nec enim autoritate solum apud principes Germaniae plurimum valet & in regendis rerum etiam difficillimarum consilijs auctor facile princeps existit: sed quoq; haec schola Rostochiana bene feliciterq; constituta, una cum prosperis auspicijs huius urbis inclyti senatus, eam finitimis regnis prouincijs & populis impertit benignitatem, ut postq; suae gentis homines hic bene excellenterq; eruditi sunt, suae Reip. constituendae & gubernandae veram & beatam rationem consequantur. Itaq; cum in vestris Halcionijs Dei imprimis & praestantissimi Principis vestri amplissimiq; senatus beneficio concessis, in his turbulentissimis temporibus imperijsq; totius orbis ferè conuulsatis et studia literarum nos Liunioni excolere, & veram de Deo doctrinam incorruptam, synceram, non labe haereticum inquinatam, non autoritate cuiusq; hominis conturbatam, meri-



7  
merito principi vestro Illmo & senatui inclytæ huius vr̃bis  
amplissimo & vobis omnibus; quorum iam etiam summâ  
cum humanitate & beneuolentiâ contestata est gratia;  
quas animo concipere & lingua proferre possumus, gra-  
tias maximas agimus: Deumq; Opt. Max. in filio e-  
ius Ihesu Christo Emanuele nostro, omnibus votis  
precamur, vt vestræ Reip. & scholæ tranquillū,  
quem habetis, statum, diutissimè saluum &  
incolumem conseruet, & honore lite-  
rarum, veritate & constantia  
religionis, vbertate terræ &  
omnium rerum felicitate  
beet & au-  
geat.

D I X I.





Z

K.B.



